

學製齋駢文

清道人



PL
2718
.I245
v.1

PL
2718
I245
v.1

學製齋駢文

楚園

EAST ASIAN STUDIE
PROGRAMME

夢樂齋輯文
卷四

EAST ASIAN LIBRARY
UNIVERSITY OF TORONTO LIBRARY

學子製齋駢文

二卷

孝育




江甯

蔣氏


校印

李詳字審言揚州府興化縣廩貢生生於咸豐己未明中極殿大學士諱春芳諡文定八世孫
世居本縣東嶽廟橋南西距范文正祠約數百步父主簿君諱士旁加曾於道光己酉移居鹽
城縣西鄉秦南倉鎮南距本縣七十二里主簿君懷仁秉義處斷曲直鄉落化之有漢季王烈



復雖有繼妻在室五子一女兩孫比肩至若詳之積疾排慘所得僅此孺人沒後未有能憐詳
者嗚乎傷已私慮鄙文播於都邑有不悉詳家世或轉相咨訪重勞虛仵因以駘它之貌揭於
卷首復稍次平生梗概俾諸君子易於物色古有零丁謫生之文此庶其變體焉後百藥生記

寬和風母趙太孺人慈讓
十奄辭人妻趙孺人
諱雲珠為太孺人之姪
歸詳廿有五年卒於光
緒戊申年四十有九孺
人勤以支貧儉以率天
不忍以御侮禮以相夫
不慙遺失我良匹老客
江湖遂無已時孺人若
在詳蚤杜門簪書庶幾
略有表見豈僅以區區
文字流布醜拙今當此
集告竣父兮母兮見背
已久予美亡此信誓不
已久予美亡此信誓不



Digitized by the Internet Archive
in 2009 with funding from
Ontario Council of University Libraries

學製齋駢文序

譚序

日星絢空草木繡壤文章之道發乎自然蓋視此矣夫勤學
好古之士有本而文因華見實漢晉以來之蹊隧寄心所在
稱情以言真宰既存趨向自異興化李君審言少通羣籍涵
濡宮商好爲閎麗之辭善持文質之變不佞於君撰著之文
默識其浸淫流連於柔厚焉迹其登高弔古遐思松楸作賦
懷賢遙攀荃蕙選辭務取其精拓宇必準於古信足遠揖陵
信近招孫洪年已七十固不能妄歎矣竊以文必有學能自
得師君於會稽之章涇之包仁和之龔荆溪之周邵陽之魏
今之古人託若尙友反復學製齋文集翫索吟諷以序其端

光緒辛丑初夏杭州譚獻

馮序

李子審言振奇不耦餐勝如歸晨擧九流之芳夕漱六藝之
潤肥西蒯侯雅相揚詡淮南劉生亦共商略心藏心寫殆越
終星竭來海上始得奉手禮公沒已再歲世變益不忍言矣
陵谷遷貿戰枯棋於一枰人琴摧傷栖宿草於半壠僕與審
言萍波旣翕苔岑亦契掎撫文史孝緒七略之傳臧否人物
孟堅九等之表暇出此編無忝作者鄴下雅材捐遜嵇阮廣
陵蒼舊抗希徐劉並驅蕭梁之先不隊李唐以下於戲盛矣
僕少事塗抹晚乃頽唐舊識落落邈如游塵孤懷謇謇竭於
枯井把卷三復纍息彌襟甲寅短至金壇馮煦

繆序

興化李審言明經首識之蒯禮卿坐中苟陸覩面不作常談
蘇李知心託諸詩句居鄰坊曲驅蟬蠹而劬書地隔關河附
鱗鴻而論學羅濬修志聘萬里爲同羣平恆講經舉梁祚爲
教授緣深香火契結芝蘭已十數年於茲矣荃蓀自遭國變
竄迹海隅心旌風搖芳訊雨絕不張羅而謝客非種菜而閉
門適劉蔥石參議聘君授讀乃自射陽閒關而來相逢天末
各訴流離照影鐙前咸悲老大范張密契離羣已隔夫三年
嵇呂相思命駕不辭乎千里杜鵑聲苦寄華年逝水之悲胡
蝶夢寒抱地老天荒之恨賞音知己早歸臥夫青山

謂益師

設

醴舊人半銷沈於黃壤

謝子受蒯禮卿諸人

雖銜杯揮塵仍似曩時而

擊筑吹簫徒軫隱恨矣日者君以駢文付諸削氏授簡荃孫
命爲弁言昔刊媿生叢錄宿諾未償何敢再辭以滋罪戾君
博覽羣書尤通蕭選熟精逾夫詩聖貫串過乎書簾天孫餘
錦夢中乞自景陽雪堂義尊佳品詒諸和仲固已輝映冊府
名重士林縱復錦囊投溷命同長吉之窮論語代薪遇等陳
奇之酷然而廣搜近作默憶陳言傳不在多古莫能及五光
十色繪畫之采愈新千辟萬灌于莫之鋒誰遏嗟乎世道日
薄文教日衰裸壤而誚龍文龔俗而譏鳳翽玉臺新詠近俗
體而獨傳金箱壁言賦高才而不遇君獨不然我用我法立
意必深無土龍之誚隸事必切無疥駝之嫌出語必響無鳴
蠅之矜抒藻必精無腐鼠之詆比青儷白卿雲奐黼黻之華

刻羽引宮天籟遏笙簧之韻昭代此體名家尙多以君之才
庶可爲殿世有解人當不河漢斯言也歲在旃蒙單閼午月
江陰繆荃孫序

沈序

審言治文選學有年厭飫優柔硯研筆述劇材鄧林鑽瓠屈
轂文身句身之從來事對言對之隱複靡不循其本始究極
根因當其得意遂若奉手選樓親紬書簾近代爲選學者胡
氏能明訓詁梁氏頗審異同鉅裘裒然不若審言一卷碩師
千秋冥契也精理所積發爲文章據江介以泝洛中本裴謝
以劑江鮑文清旨詣秀擅當時素練輕縑質周世用以言情
者語古思新以述事者文華理暢嘗謂名言熏習用起家風

業之待熏若菱蘆之互倚習之生識爲莖藤之染香惟所業之軌軌匪今斯有文而波瀾皆古審言聞是許爲知言準此以談則太傅翰藻之論大令鈔撰之心蠶畚經訓容甫所以騁漢京詠味玄虛芥子所以追正始柯則不遐期達同達此兩爲之跂余有望已李氏自盛明以來四百餘年爲興化冠族宰相列表英賢在譜官告昭其世牒箸述錄於史家及審言而轆軻客游自稱寒士嗟夫繁霜旣降喬木先摧王澤旣窮三川遂竭長尾之流移靡訴慶伯之阜隸同悲天厚審言獨賦清才鳴其不遇還視夫病馬長暗好兒終啞者固猶有一朝之快與乙卯仲夏之月東軒病叟植書

蔣序

國榜嘗謂乾嘉之際海內又安達而在上者若鎮洋尙書大興學士青浦侍郎儀徵相國其名位既足弁冕羣才而獎掖提倡風會所扇人文蔚起博學工文有若孔輿軒孫淵如汪容甫凌次仲諸子皆能陶冶漢魏六朝或稍涉於初唐以自成一家之言吾師審言先生生於揚州後容甫七十餘年而起獨好容甫之文而不襲其形似國榜稍叩先生論文之說曰積材宜富取法宜上攝於訓詁而歸之典則防其汜濫而爲之隄障使於奇耦交會之中有往復流連之致則筌蹄皆在所棄矣先生於近世號爲北江仲瞿派者殊不喜謂學北江不成則鴻材之苑皆兔園之冊也學仲瞿不成則狂泉之飲皆鄱陽之謔也國榜夙聞於先生者至殷且悉唯知服膺

而莫敢贊一詞焉顧先生窮年兀兀雖名聞士夫而無償於
當世如容甫爲鎮洋大興青浦三先生所禮而與儀徵相國
爲年少末契之結納皆不可得蓋僅有其窮而未有其遇嗟
夫士之失時而風會有不能爲之主宰也國榜與弟國平束
髮受書即心識先生之文乃先生前客江甯無由自見去年
馮蒿庵先生始紹介以奉教於左右時進國榜而語之暇出
此編示其源流所自國榜請先用活字印行以饜海內之望
都凡文八十首分爲兩卷國榜謏陋至不足稱然屠龍之技
舉世所棄國榜方思殫金而學之其亦必爲人所棄而但求
無棄於先生幸矣國榜旣聞先生緒論益以自多惜亡弟國
平墓草已宿不及事先生又重予人琴之痛也乙卯四月江

甯受業蔣國榜拜撰

自序

宋姜白石論詩有自然高妙之說余嘗執此以論駢文雕篆字句與貌爲瓌麗者皆乏自然之趣而余心以爲未可焉讀古人之文稍多其中恆有伊摯不能言鼎輪扁不能語斤之妙醯醬規矩其跡也若調和之適口甘苦之應心作者能自喻而已詎可執涂人而語之邪余爲駢文二十餘年所得僅數十首昔時親友勸余爲癡符之炫相率助資期於速成余悉舉以濟朝夕之乏今老矣思持此爲立言之一幟

左傳正義謂屈

原宋玉揚雄制作文字皆是立言

且欲廣其說於士夫間江甯蔣君蘇庵新

從余游知余意有所寄請先用聚珍鉛字印行兼任較讐之

役余驚喜過望因取諸文付之使余之文稍有一二播於人
口或取吾說推而廣之蘇庵之功不淺而余因以答親友之
貺如去胸中之梗而大快焉蘇庵之爲吾計誠善矣哉乙卯
四月李詳記於海上寓廬

當塗詩人奚度青侗昔官鹽城與詳雅故近佐讞海門
知詳校印鄙集行將藏事先以鉞金五十購定如干部
隱寓退之薄少相助之意而懲杜陵寒暄虛名之問旣
謝以詩附箸於後傳之好事或亦語林之資焉

雕篆圖徽迫莫年故人分奉寄金錢恐妨折閱投虛牝

憶共班荆感逝川換我幾時堪售直

張文潛記士人換
書事見道山清話

笑君錯愛欲成顛平生好鼓流波引目極蒼茫海上船

學製齋駢文目錄

卷上

西園鶴賦

思君子賦

述舊賦

託微波賦

三怪物賦

廣謳

招兩生辭

五君頌

合肥六友頌

蔣母旌閭表石頌

汪容甫

先生贊

與王益吾先生書

答益吾先生書

謝益吾先生書

與劉楚薌明府書

與宣古

愚書

寄顧石孫書

乞修宗子相祠墓書

與許次曼書

與姒季先書

與周左麾書

與黃叔頌書

復譚仲修先生書

乞樊方伯檢

還學製齋文槁書

與王子常先生書

答朱菊

屏書 乞鹽城尙志書院諸君分寫文集啟 謝

孫明府啟 謝徐積餘觀察啟 與屈逸珊夫人

啟 海上流人錄徵事啟 城南舊游記 射

湖春泛記 游焦山記 游後湖記 吳溫叟

青溪泛月圖後記 海天夢月圖記 顧詩箋註

序 京師坊巷志序 懷知詩序 海上題襟

詩序 送王月莊赴京師序 送經壽庵之天津

序 自序 先君子手書龍文鞭影敬跋 雪

橋詩話跋 蔣君遺令跋 說別 名士說義

改字藥房說 擬建鹽城縣臧洪祠陳容祔祀

議 讀文中子 摩兜堅室詩題辭 南洋勸

業會雜詠題辭

卷下

周制軍七十壽序

曹中丞六十壽序

李仲仙

中丞五十壽序

刪觀察五十壽序三首

劉葱

石參議四十壽序

李小池太守六十壽序

顧

耳山姻丈六十壽序

朱君八十壽序

王煦堂

丈六十壽序

汪量甫先生六十壽序

顧石孫

四十生日壽序

梁姨母趙太孺人六十壽序

唐母袁太夫人八十壽序

謁楚元王廟文

弔

任子田先生文

黃漱蘭先生誄

哀輪船文

哀兩許君文

謝生哀辭

許梓卿哀辭

袁淡生哀辭

祭史先生文

告祠堂文

祭

族人某文

附南通州費君鑑清小傳

答嘉應古

君公愚書

勘誤表


卷	頁	行	字	誤	正
上	十	十八	二十三	夔	夔
上	十七	十九	十七	胖	胖
上	十九	七	八	屈	屈
同	同	十一	十二	袂	拂
上	二十一	三	三	賚	賚
上	二十四	一	八	冊	冊
上	三十一	十三	二十二	氏	詩
上	三十四	八	十二	玄	玄
同	同	十三	二十一	恐	怨

上	三十六	十四	九	謂	爲
下	八	十三	二十三	卻	卻
下	三十三	二十二	四	攝	蹻
下	三十五	四	十七	玄	玄
下	四十一	十五	十七	賚	賚
下	四十二	十八	二十一	賚	賚

學製齋駢文卷上

興化李詳

西園鶴賦



余以光緒辛卯獲游桂林先生之門假館官邸儻再冬夏署
之西園舊蓄一鶴瘦影拳立哀鳴向人余朝夕出入輒與相
見耳接清韻目想寥廓索居岑寂對之損懽因爲賦一首寫
以素紙質先生於金陵且冀歸來有期無令茲鶴怨也

東海之鶴兮寥戾而獨飛遭離網繳兮斂翮而來歸謝虞人
之膠致兮奉君子之光儀屑梁麋以爲餐兮託曾軒以爲棲
步襍褻而效舞兮奮踉蹌於前墀瘦清冷以戍削兮鵠鷺渾
兮參差揭修脰以高峙兮渺羣禽而若有所思憶昆閬之揚

音兮悵飄搖以遐阻別佻喬之列眞兮歸喧卑之寰宇翹翮
偃其殘毀兮形神摧其呂鉅悼展轉之數遷兮翩連軒而依
主縱輕軀於西園兮鶩往來以襄羊憩清風而長鳴兮嘯離
鸞而下翔矜胎化之偉麗兮羞孔翠之文章吸湛露之滋熙
兮嗽朝霞於正陽秋風迅其嫖忽兮天地結其愁陰慘於邑
而無色兮判離憂其難任顧草木而如喪兮詎伊禽之繫心
守寂寞而自媚兮荏苒忽其冬春歷霜雪而踟躕兮驅羣艷
而就馴情依依而有訴兮歎對臆之無因慕意而之迫脅兮
時徘徊而畏人嘒雞鷺之餘食兮軒卬藏兮挺身漚鳥尙其
可狎兮唯茲耿介兮不可親仰矯首而遐視兮獨奮喙兮昏
晨亂曰遷延邪睨意難測兮整翮理翰自矜節兮貌若闐暇

心憂戚兮山林皋壤永以爲則兮

思君子賦

余仰慕賢達竊遘多幸瑞安黃先生其一也先生還朝後獨立不猗見忌羣貴雖屢預校士之役忠憤菀結不得自申遂謝病去位自是朝野宿望彫落且盡先生歸然爲後進領袖天下識與不識咸目爲黃瑞安而不名或移貴筑黃琴塢硬黃之僂僂之余年垂三十始受知於先生錄爲附學生員私以黃門弟子詫多於眾人謂爲陋不知古人師友之風義非有貴賤第也先生頃歲家居余臥疴僑所慮先狗馬不舒所懷往見江都焦循彫菰樓集有感大人賦爲諸城劉公而作先生上齒文清無忝名德余諸學不逮里堂若於詞賦差可

擬準因效爲思君子賦一首存諸集中異日用簡知我不必

寄先生也

末語用杜陵同元使君春陵行序亡友鹽城高君鏡蓉能舉之

甌越之負海兮絡揚州之斗躔水瀾汗以騰波兮山嵒嶸而
擢天矯逸翮於風穴兮濯潛鱗於龍淵徑路絕而雲通兮鍾
純懿之偉人互修姱以容與兮羌蘇世而獨立高千仞以翔
翔兮疊重芬而相襲抗人倫於有道兮儷樂安之任君采英
奇於仄陋兮振淹滯於無聞乘輶車於東南兮披元雲而高
狩張八紘以爲陸兮揜羣飛之棲宿藝有薄而必陳兮聲無
微而不奏翕吳士以奔走兮若百川之朝宗升堂室而躋奧
兮謂可疇乎登龍得一善而肝衡兮喜尊酒之不空昔孤生
之見甄兮瞻簪裾其日遠雲容容而鄣燕兮塵相逐而不反

鳳皇屯於梧桐兮厲哀鳴於歸昌鷺鳥之彈射兮奄摧頽而
自藏託平陵之朱游兮皆東閣之俊英世變之悠悠兮倒上
以爲下孰云誓墓之不回兮將以避夫懷祖車旣駕而竭來
兮去京師而周流過夷門而太息兮方揚子之輕舟終壹鬱
而不適兮歸栖遲於林邱范會之旣老兮變嗣武而得遷稽
陳郡之謝錄兮訊太傅於東山粵旃蒙之再覲兮憺貧辛兮
不自聊揚予靈以極目兮惜美人之不留汨竄身於清漳兮
世溷濁而不顧竊九死而靡悔兮其孰能察余之美惡求芳
草而遠逝兮心怵怵而狐疑閔川涂之無梁兮日埃瞽而蔽
之四序迭代以變易兮意怳怳而焉薄恐余偃蹇而蹉跎兮
身將老而爲客眾不可戶說兮天不可以爲正思君子之華

予兮詎古今而異情

述舊賦贈王雷夏

昔余之求友兮惻炎劉之淮陰濯滄浪而晞髮兮悅臨風而

哀吟覲予美於解署兮

辛卯與君兄道農定
交於淮揚海道署

夥所見之沈沈

悵中山之虛戾兮誕絳羽之靈禽蝨微官而連蹇兮進與退

其難任誼陳高而申懷兮嚮淑貺於兼金羣從翕其好修兮

紹絕緒而復尋遡廣莫而南征兮操燕薊之北音偉季子之

多才兮惠旅舍之見臨重分手於須臾兮卹余病之不斟歲

在猴而逮犬兮樂相逢兮素心兩鳥忽其一鳴兮草木變其

樛樛乾坤雷礮而雜沓兮鬼神甜醅而滯淫信有美其必合

兮嬪終古而至今尹陶陶於永夕兮郭款款於同岑揣權衡

而秉纘兮宜司慎之不歆松柏顓其受命兮歲寒休其相侵
余灌圃而爾鍛兮期山陽之竹林

託微波賦贈湖南翁君季枚

一士之獨處兮懷佳人兮四方浮雲頽而不下兮高鳥飛而
不將蹠蘭畦與蕙畹兮願廣寧夫眾芳互東西而北南兮軫
營魂而方皇美要眇之見留兮路曼曼其阻長遠結言以相
詒兮睇修蛾於衡湘抨蹇修以爲媒兮獻洛靈之明璫款余
情之燕婉兮心徘徊而未央日晡晡其蹉跎兮冬申之以嚴
霜汨川涂之回穴兮閔射陂之無梁襞赫蹠以通誠兮媵文
鱗兮河之魴詔陽侯以舒波兮冀自達於君旁重曰有美一
人曠解后兮稟精火維保明胄兮奉手先達我故舊兮聞聲

相思評仄陋兮刻畫嫫母心孔疚兮閉門陸沈狹宇宙兮勝
引末光庶錫恂瞽兮

三怪物賦

唐李義山有三怪物賦暇日儼之以究物變

其一曰臣姓虎儀氏帝名臣曰竊威字臣曰媚疇而官臣爲
籀灰籀灰之狀口如布穀足及奔馬括羽天際吮血平野其
能變白爲黑築朽成香懷腐嚇雖編箴囚凰夸舐痔之列乘
勺宵燭之末光恃烟火之不及偷濡需而自藏昊飭六丁下
偵其旁縱跡遽闕莫能知詳原而命之曰虎儀

其一曰臣姓莽祖氏帝名臣曰詐倪字臣曰善隅而官臣爲
呬醯呬醯之狀密運心計矯積面垢周旋營索剋窮求富半

菽委甌千金匿甌其能疏擯骨肉懷悵等疇飾公孫之布被
舉興祖之祗裯錡筒操其善閉棺絮奄其見收諡之曰虜尊
爲盜流稗官書之以爲後世羞

其一曰臣姓蹇午氏帝名臣曰健根字臣曰棗華而官臣爲
扈門扈門之狀微名獵譽方行雅步志大宇宙言滿道路丹
沙奪赤緇塵涅素面目有愀首尾不顧其能內惑妻子外重
周親詔良施楷恕己量人敖倉夷爲圭撮昆峰失其瑤珉毛
甫披而見革跡未踐而背眞請占於五泰五泰不知其故揲
著而得之曰此名詭臣

廣謳一首爲劉楚薌明府作

鎮海劉楚薌明府先後官鹽城數年坐絳吏議去職事會得

白鹽之人士引領南望若念慈母東南村聚田更廝養偶見
河上有峨舸張紅幟輯濯而過必曰劉公復任矣走相傳播
既知其非也鳴悵而退余僑居河濱屢聞此語竊歎古有尸
祝俎豆如楚庚桑之徒明府殆其人與明府既留省會大吏
高其治行將復畀以鹽猥遘瑕釁重被苛問明府殊不介介
道路甲乙有言明府思於秋時投劾歸里奉母自娛聞其志
甚堅余恐鹽民怨思鬱伊不宣作廣謳一首俾好事者歌之
以達情云

謂公之來兮障袂以睇謂公之歸兮噉然而悲公不來兮民
則那凶德參會兮張蔚羅上無逸飛兮下無走坐撫机兮顏
孔厚青衿列植兮乳鰲相牙民日瘠兮吏甚都昔之去兮怨

不留目極江上兮徒煩憂神靈兩兮天無正虎豹彊梁兮愁
屏營君所思兮併日夜多問父老兮敬長謝身雖離兮心則
同安知出入兮余之從容滄洲近兮吏情疎棲遲奉母兮可
爲居

招兩生詞

余與世寡諧性成通蕩宿昔知舊幸爲所容風雲不歸遼絕
千里袁顧兩生遂隔南北行行重行岐之又岐嗣音屢阻入
夢多悻作招兩生詞以通之

招袁生盍來歸越小宰何能爲謁長官鼓隴胡民疚疢徵保
辜淵有鱗岑有虎鳥訴牒蛾潛弩朝推囚莫程臚鬱奇意黜
塵服淮南州樂事多緩衿帶行嬾娑山之宰路阻修心煩懣

徒離憂

招顧生歸故鄉家清門世文章富韞韞志西行囊不充梗所
生齊飲井至相粹才翩翩何沒沒宴南皮款竹林曾幾時愁
難任遠極目四千里怨靈修俯予美關山月蒼梧雲馳徘徊
思見君

五君頌

酈善長水經注河水篇載漢司馬子長墓言永嘉四年漢陽
太守殷濟瞻仰遺文大其功德詳竊偉其語深相欽挹因求
本朝文章橫厲一世計有數輩揆厥功德恒爲獨絕遂妄希
殷生箸頌申慕今共覈得五人曰會稽章學誠曰涇包世臣
曰仁和龔自珍曰荆溪周濟曰邵陽魏源

東南之美會稽多聞高舛劇談上掩子雲目矐區陬心醉典
墳砭骨抉髓寧蕭得薰濟清河濁合流殊分瞑目恣手功成
運斤書規仲瑗師崇竹君鄂渚遊衍方志策勳漢唐二劉

劉勰

文心雕龍劉知幾史
通君書可與爲敵千載同羣

右章君

安吳英鷲駿馬盤稍冢宰致禮見詫麟角天葩奇芬貞柯秀
擢覃精奮藻泣血證璞提挈亢士宏長末學消搖林邱談笑
方嶽揚蜚復關里醜巧詠鬱爲文棟遺世屯剝六合黼朗邈
矣鸞鸞

右包君

環孕越紐篤生文雄鞭捎霆雷鬼神嘯空旁薄無朕汗漫鴻

濛濛陰閼陽元精貫中春淒秋頓霜露所叢脣墨含鵠積憂
籠東園令早粹求妙臣忠畢如宰如卿雲長虹欲抨巫咸招
此一龔

右龔君

觥觥保緒俠武兼資膏馥滂葩驅邁文辭雲裳緞黻翠粲陸
離宛轉園生高謝人爲薄宦連蹇述往雪躋房喬起疾魚豢
坐歎以君略名始自魚豢折節儒術佐軍旌麾扶風豪士方古
可追焉得重起作今世師

右周君

尋木起欒漏潰蟻壤魏談九州力逾龍象輶軒絕代重譯來
享山傳論兵世絕心賞箸書自娛摛文獨往歸昌奇律霜皋

振響神劍辟凍干莫在掌堂蓑見陵門倚翫髀前賢不存吾
將安仰

右魏君

合肥六友頌

禹貢之東陵阮文達謂自揚州蜀岡迤邐至於合肥以西皆
東陵地詳揚人也論交遠方之士首識荆君禮卿殷君孟喬
次識劉君訪渠李君健父又次識張君子開其李君協臣則
從余游者識在訪渠之後皆合肥人與余論學結契歷有年
所不以寒暑易概不以榮悴弛敬致之元天之上而謀之未
已出之黃泉之下而被之再四得食則呦呦相呼擇木則嚶
嚶求故豈非地脈潛達風氣如一好尚非以立名質僊反以

敦薄其視操權衡秉纖纊者喻其高下殆相懸絕余雖以名字箸士夫間其於六友疇昔之誼固不可忘也荆君既逝尙有五人謹第而頌之以抒余情云爾

荆君英英生民稟秀長劍倚天短書納袖偃息篇章參厠耆舊言怖無極名署不門開徑延賓刻畫宿瘤市肆立平草木同臭酒慙深杯談競辨固權輿夏屋稍雲春岫游岱須臾招魂恂簪凜凜猶生鬱鬱誰覩有淚傾河遐哉得茂訪渠琅琅如古烈士日飲無何愛書入髓高揭長松俯蔭仙李禦侮顏頰送噓體委居則聯席出必錯趾正景樹臬捫表知裏信箸丹青言鬱蘭芷艱難露心鏗鏘溢耳各振風雲俱奮泥滓小別耿思暫見失喜永爲弟昆誓與夫子

子開沈冥蜀莊之流目營四海胸羅九邱通夢岐路抨媒蹇
修因憶乍識如病獲瘳豁吟裘氏評賢白樓歸墟善沃雕服
惟菽爲而不有言無不讎運斤盡堊忘機狎漚獎君齒牙閔
予歌謳頭甘見責舌慕爲柔庶幾兩生畢景魯鄒

孟喬逮羣升堂晚令屈轂鑽瓠白旃概鏡舛覈是非部居雅
鄭疇昔啄菹相倚爲命彼我通懷騎驛司柄游刃有地貫的
餘勁解帶輸誠裹飯起病阮公密識晏生久敬酸腸遞澣悴
容互慶旣竭府奧兼達情性幸代舊游已矣難更

健父翩翩千載一遇持方昔人性德鞏祚

昔躋君於成客
若龔定庵之間

蘭

錡內設網紘外布公子敬愛名儒款傳揚權文字說繹風素
百萬栖隱十年種樹仰噴鹽車道周左顧仲祖屢索傳瓊差

互報無玉案枉贈金錯餘明四映輕舟可泝時過清談信美
無度

協臣童牙不鏤自雕羽林遺孤湯田茁茁躍冶斬鑄挂壁弛
弭羸滕履躋出幽遷喬技殫支離霧披公超得子左右起予
舖朝潛鱗上噉采翬雙翹凌夷共卹壘塊就澆名師自衛結
友惡佻憬彼七萬道遠形遼

方游學蘇格蘭

歸來歸來吾欲生招

楚詞

招魂言生招也杜詩多本此義

蔣母旌閭表石頌

司馬紹統續漢書百官志凡有孝子順孫貞女義婦讓財救
患者皆扁表其門以興善行案說文扁署也從戶册戶册者
署門戶之文又表上衣也古者衣裘故以毛爲表引申爲凡

表箸於外皆謂之表史記留侯世家表商容之閭索隱引崔浩云表者標榜其門此扁表二字之義所出後世綽楔石坊推原古昔益恢而崇之然其朔可考也江甯蔣君國榜少孤厲學漸於母教賴以成立宣統辛亥江皖霍潦爲菑其母夫人助振千金由馮盛兩大臣奏請旌表得旨如例國榜爲之刊石垂象表署亭桓昭示來許自爲後記具述母氏懿行余受而讀之敬爲賢母歎息者再夫義之取類至廣鄱陽洪氏曾箸其概如漢志所謂義婦凡守節撫孤讓財救患皆可被以此稱今夫人兼而有之國榜仿漢人石樓稍變其制以報母德既合東京扁表之訓又符成周旌別之典於禮爲可興化李詳與國榜友樂聞斯舉爲之頌詩以永其聲而達其趣

焉頌曰

茫茫塉黷風塵晝昏人靈騫翥越禮墮籓有淑其媛作嬪清
門移天茹痛植節援菴懿此淑媛載誕洪族杜陵扶風表裏
悅穆煩擱翹勤蘋藻齋夙德象紉篇周官習讀昔事夫子儷
如鸛叩魚菽治饌緇素示恭婉婉先後煦漑廝庸皇靈不鑒
降此鞠凶鞠凶伊何諛詒爲病元瑜異物臺卿無命提孤坐
側血淚橫迸霜雪摧柯雰霾點鏡淒淒嬰保惇惇兩雛折箋
斷杼竹馬鳩車爲山基凶發蒙擿塗嶄然有見渥洼之駒川
無止水林鮮靜樹男仲楊烏奄隨鄭固伯也獨才被珠佩璐
掩涕侍親設醴奉傳榘斛坐障仰承母慈漆室憂魯宗周恤
釐綏姻贍族蔚爲女師撤我環瑱振彼饑羸聖皇可奏被以

榮名閭署行義臺築懷清祿翟有耀鉅規兼呈峨峨石碣過
者屏營禮宗圖象班爾變態寵荷生存儀形瞻對稔侯臚歡
高門箸戴奕世式廬有舉莫廢肆筵設席享落娛賓矇眊子
姓戾止纓紳奉觴上壽錫類歸仁愧工摛屬罄藻鋪陳

汪容甫先生贊

容甫先生孤貧鬱起橫絕當世其文上窺屈宋下揖任沈旨
高喻深貌閒心戚狀難寫之情含不盡之意可謂漢晉一貫
風騷兩夾淵源所被彌復不逮沾溉既廣去之愈遠昔在羈
鼎獲覩嘉製祕等論衡珍逾鴻寶晨夕握翫荏苒廿年又其
爲人內行敦篤表裏勁俠端臨儼之嗣宗澗薺推爲節士求
諸古人實難兼備斯尤樂爲服膺者也贊曰

廣陵斗分世炳楚英粵有窮者含章挺生過鄰雪泣傭市厲
精母爲女宗貞筠霜峙晏嗣鑿楹黔婁正被苦櫟朝含寒檠
夜起昂成令器黃中通理聲名籍甚千夫辟易摛文抽簞譚
經奪席篤嗜流別輸寫糟粕萬卷侈富羣言傾液子雲筆札
長卿溫麗宛轉關生茗亭容裔言超繫表辭窮語際涇渭分
明眾乃謂狂擲置荆璧解驥道旁黃祖受弔孝標自傷當時
桐城首倡義法惟君上溯導源三峽藻耀高翔詞宗絕業節
甫

江鄭堂

次仲

凌仲子

奔走承乏懸並日月不墜塵劫

與王益吾先生書

壬辰夏仲一附郵書鱗羽驕沈叩心失望自以所言猥雜慙
惡無從夙夜震惕若含霜雪竊感周易不遠之義詩人胡顏

之恥用廩廩於名節戚戚於時序既無甯生倍年之勤復無
陳平長者之譽出幽嚮方鮮珍穀之獲懷和抱景闕巨瓠之
用家貧親老復從遠游比處脂膏不能自潤向來舊業研課
爲難掇拾奇零僅加料理刊定二卷先奉清塵洞庭未波輕
舟可泝儻徼天幸微忱遂聞冀鍾季本論不擯清修裴啓語
林易長名價庶宏曲貸俯鑒拳拳

答益吾先生書

詳頻歲家居比閱三稔沈縣肺疾九死何聊里黨視若游塵
天地淪爲棄物坎廩失職勾賁爲生去夏弭棹袁江重經舊
館府主相見出示先生賜書并漢書注三冊敷衽踞發循誦
涕零伏維先生海內人倫言滿天下朱紫月旦宜慎裁量庸

有徇汙漫之孤技恕支離之攘臂加肉於腐齒施斤於社櫟
雖辱長者降挹之答實深賤子愧墨之謝矣班漢之學鄉未
津造卒業來編橋舌怖偉不朽之作懸諸日月復何足云昔
詹事考史侍郎治荀上元觀橋之緒聞江都容甫之定本甄
錄門徒傳爲休譽詳則厭次不名撐犁罔識景祐舊槧弇州
祕笈鑽味異同罕尋戶牖塵露之微奚裨山海惟有緹錦弄
臧昕夕握翫尊毛詩之後箋紉山經之廣注比於召陵故訓
遠郡相師孔公春秋一辭莫贊更希畢鏤快睹全書重荷殷
勤謹此陳謝

謝益吾先生惠題慈竹居圖書

昨奉賜函踞發環誦琅然至音裒背臧棄遂足冠古伏念先

生年逾耳順孺慕未忘灑淚迎秋軫情吹雁

以上皆鑒括先生詩中語詳

重此棖觸歸思彌殷賡補白華弭愆晨夕別呈竄作庶見鄙

心但恐飢來見驅明歲春初又將遠出耳昔讀先生漢書補

注敍例昆弟彫零言之酸悵今欣羣從之間復有追響斯冰

不迷點畫

先生臂痛此冊屬其從弟先慎用小篆書

龍鳳虎豹萃於一門引領湖

湘傾羨何已詳於廿日前後束裝回里侍母謁醫獲申私款

謹肅陳謝不及猥言

與鹽城縣劉楚薌明府書

渴日麗景醺薰布炎循問宣昭益軫勞勩伏聞所治禾黍映
蔚烏鹵膏腴里端箸籍羣頌神明春秋決獄不懈經術昔潘
仁河縣令名患其不劬劉方襄城璽書嘉其獨異其於閣下

行見之矣詳單家孤介借塵爲萌洪河九澗旁漑涸源梧桐
百尺仰藉餘蔭貢叔口腹爲羈謝以相存長卿歌賦還邛遲
其一見冀慕風流匪伊朝夕顧於壯歲旅食蹉跎道不挂於
通人學未騰於州部客歲乃蒙雲村明府謬采虛聲遠頒嘉
幣招與惕庵孝廉同纂邑志垂之方來夫自昔圈稱陳留廣
微吳地皆以鄉人勒成洪業何緣厚幸參與翱翔豈以詳雖
編客籍已變僊音金城日南之對不昧條流士女耆舊之志
夙所甄敍故使齊駕廣術挈耀燭陰承命踟躕載深兢惕執
事下車甫始敦述舊聞策厲儒輪期於斷手竊謂含豪輟簡
賢智所羞鼓瑟吹竽識志各異陸機清芬之誦無預甄文張
儼默記之書非關實錄與伯起作色則驕蹇橫生求法言載

名則羈廁失序人已互規得失自見所冀閣下掃除羣蕨研
覈是非懸獨照之鑒運成風之斤定彼紛紜歸諸至當詳輩
當執鞭弭與君周旋不朽之業願附末簡狂夫之言幸見采
納謹修尺牘上訊起居隆暑赫曦爲民自愛

與宣古愚書

前於客坐獲奉清塵談燕雍容欣暢襟抱寒禽側翅接援翼
而飛鳴洪鐘閤響履微霜而應律取別俄頃爲歡未央城闕
之詩以日喻歲歸舟天際南望徘徊今之少年罕能箸述諸
子繡襦是爲王謝佳兒高齒長檐目爲貴游子弟要津九派
競襍衣而同趨新書一卷資解褐而已足其有攀鱗附翼演
雅綴文裴啓述謝傳之辭衛權注左思之賦製名譎詭拈誚

如駝設論支離墨難含鳩韓卿摘藻躡傾軌於顏延仲宣箸
書昧抨彈於鄭氏乃亦妄思流布輕肆雕鐫江南短牘橫炫
癡符鄴下叢談矜傳伴侶諱其假翮惜陳琳之名存謬謂懸
門動楊雲之手攫凡諸鄙陋曾何足云足下開美稟度璽瓏
箸聲弱年弄翰博極羣書壯歲覃思浸淫古學其於典午逸
史幾徧蒐羅積有成書預聞略例冀先剗剗庶廣流傳將使
淵如咋舌逢之變色吳中大姓傲愴父而不能河北名宗爲
魏郎而改視然後窮地兩戒談瀛四夷史遷創表放世譜於
成周博望乘槎暢皇風於炎漢

古愚近爲西洋各國世繫表

恣君局幹會

在騰騫下風傾祝如是而已詳雖邀盼睠無補蹉跎一經不
治三史廢習貧執太行之憂隱媿南山之豹雕蟲篆刻執戟

羞爲緇繡繁絃含豪是寓江淮選學謬附鄙宗之後塵向蕭
神識懼詆馮光之孤陋汗青無日頭白可期脫橐稽遲尙難
自信倘其分霑玉瀝俯乞霞佩爲之考淹師之音義闡秋儲
之奧幽具箸姓氏自有前例士衡地記述問張公浚長字書
亦載某說敢有攘竊以詒毀玷牽率致請用博莞爾潛鱗北
游勿吝箋素

寄顧石孫書

芳春九旬屢奉書牘情循章而遞歡愁追款而委抱相去數
百且若天末近者三千更阻夢泝此行由江涉漢水程紀郵
鳴禽異聲碧草共色感物造端屬思奮藻瀏然鏘然益企繁
富比抵官舍當得從容爲樂何如足傲儕輩昔者鰲螯今則

參商人生幾何，儻復老大修名不立淹留無成稱疾避事差
符長卿之眞爲文傷命甚違魏武之說索居自娛唯在駢儷
壯研雕篆取媿成都楊君妙合纂組私契牂柯盛子數月所
得不下十首僅以數篇寄供遠覽賦性愚拙顧景茫茫疇昔
懽聚資君商榷仲路禦侮恐懼不遺眞長數過輕薄是屏我
思何所乃成曩游飛蓬入雲高高無極孤生羈泊亦墮淮濱
登高望遠閉關卻掃出入載愁困劣少氣問無親知嬾憎僮
僕形神不怡甚或錯迕至想足下俯仰俱適動息兼遂喜嘉
賓之出人置文度於膝上臧獲給事則呼噏疾於風雷親戚
情話則談笑沃於膏露持僕相較譬猶齊熒耀於龍燭挈崇
邱於蟻垤苦樂異趣概可知矣所幸雲霞之契無間榮悴章

絃之贊互通彈擊流水輟響尺素傳其音徽梁月在顏岐路
馳其魂夢狐白禦冬念至寒之淒愴瓊枝照席勾餘光於鄰
曲覬君真賞貢我勞歌

乞劉明府修宗子相祠墓書

海濱一隅沐浴膏澤六年於茲水旱不臻樹草自樂庚桑畏
壘月計有餘伯況襄城清芬不墜蘇息逮於雞犬政迹孚於
蟲雉斯民何修獲蒙嫗育振起頽廢至殷鄙圖竊敝邑南城
外隔水數武有百花洲爲前明鄉先生宗子相讀書處市朝
既改棟宇僅存山邱隕然實委體魄歲歷緜曖游談不聞嵇
公故居久淪竹林陶令荒園坐虛叢菊過者罕經有識興悼
夫其入樹忠鯁出震國威大名播於區中遺集塵於廣內蟬

蛻霞舉具有靈徵曾岡重阻迴異人世翫其奇麗足留精靈
臨睨舊鄉亦所翔集而音徽未沫燕歲不治鄉里後生與有
其責但一簣爲山自阻薄劣獨絃哀歌實鮮附麗伏惟執事
宏長名教重孝存之社食申柳季之隴禁誠於暇時游覽其
地詳之所言當爲不謬然後按轡文雅寄慨冥漠順風而呼
其聲加疾庶徘徊潛六尙傳公琴飛翔遼海不迷華表黃蕉
丹荔永薦芬芳秋鞠春蘭無絕終古他日流傳圖籍寤寐風
徽考文翁之石室旁稽高朕問曼倩之墟墳遠徵孝若執事
此舉亦有千秋庶幾振臂一倡斷手有日則始安讀書之地
爭詠顏延冶城酌酒之年長表何點誼切桑梓因貢區區
與海甯許次曼書

昔者蘇季箸書聞聲軫慕莊生述旨見似醉心翳雲之翰應
響蒲且之絃沈淵之鱗騁耆詹公之餌金石致靜匪由無拮
而鳴區陬甚遙恍於求通未達固有夢魂識路蹠轉岐涂幽
巖叩徽目極雲際美人旣莫蹇修來遲命也奈何憐其悲矣
伏惟仁兄高陽苗裔王公諸孫三世蟬嫣一門鴻筆威斗服
匿垂簪知名雕蟲篆刻染墨奐藻前良章陸先士胡吳不墜
若存俄空何憾愛伯仲修爽秋諸君度可鑽味耳風雲變化
寤寐顧懷羈羽沈鱗無因會合日者雷夏王子猷以賤名奏
記左右小文遙寫輕點賞音頃於渠處讀君復書獎借寒人
儕諸籤後淵聞茂緒豈所敢承湘涵早作壯游歷乘邊障蜚
狐朔吹雁塞橫雲激厲沈雄椎鍛閎麗故能躡履題襟之館

定交襲伯之庭藏有名山傳歸同好詳睇陽翳蒼嶽飲颺汾
慢戲賦草祇煩帖箋藩溷札樸劣容覆齒君子失言斯人未
逮矣若以溺音騰沸雅道陵遲提挈輩流導源麗則嚶鳴悅
其同響濁河澄以清膠遠宏士元得五之言遂寬潘仁莫二
之例南北棲遲互敦噩沒願辱嘉命一證同心蓄忍相思期
於覲面敬陳悃悃抨寄輕郵

與會稽姒季先孝廉書

姒君足下僕聞應龍天飛資階尺木擊禽胖處迅赴嚶鳴蒼
梧之雲止大梁而夷猶疏屬之拘覲懸解而悞墨交阻則同
室曠於千里道合則胡越懽若親戚四方上下此情良同裁
量所歸尤歆氣類足下文命末葉越紐俊民長離矯翼凌江

而翔稷嗣樹羽設叢自肆匠石所呵溝斷倖於犧尊秦緩見
甄砭石瘡其美疾海濱瘠邑久失導師大雅扶輪抃欣與會
異方棲屑惟有引領已耳比得同里顧君聽秋簡畢一通具
述徐君篤甫謬持鄙文質視左右足下不加唾棄致爲獎辭
且言綦迹所經曾見拙刻自叙心懸小生怪夫陽五伴侶乃
市諍癡仲任短書至勞祕翫神賞虛襟表越人境僕先世著
姓家有賜書亡考邁愍播流異所弱歲研尋迄無師授逮於
壯後屢謁通人粗習雕篆之辭恆持溫麗之旨每有造述時
苦蹇緩居貧儉薄未臻極詣近踰四十愁病纏縈游梁車騎
斥償債家說將竿牘東置匱衍堅伯有母孔邇之歎無徵楚
客思歸遼遠之魂九逝越流秦徙屏棄人間然猶唸呶稍已

染翰相從元文積好或有君山盱衡仲蔚窮居不無劉龔左
顧坐此綢繆尙虛邑邑足下滄海善受樛木維流吳門鑿響
物色琴材晉坂遷延祓濯鴛鴦隱侯一顧即抉雕龍之文有
道人倫足附歸鴻之軼私心嚙瘞南望徘徊薄技求平行知
有日但良辰未撰睇曾雲而遠睇靈瑣少留夏流波而獨奏
心乎愛矣何日忘之

與周左麾太守書

淮陰宴集曾厠清游錯烏聯裾望衡對宇魏胄筵乘公幹之
譽蔚然漢藩畀簡馬卿之席攝右忘言善謔輸款紆情月上
涼軒霜明冬翼紉書互餉甄古通微飢火宵然睡魔再遣龐
公嘉偶製出吳牋江數胡牀蹲踞楚客監河貸粟莊生濟以

枯魚敬禮定文陳思隱其繡虎降至一際分張遂成往迹足
下則沿淮汭洛洊侍賓僚贊畫嘯諾輝映檠戟近且寵光三
接遽晉崇階特簡惟良積典大郡指揮岳牧凌躡封圻文采
風流躋登勳伐會稽太守不羨承明潁川賢將擢治京輦敢
在下風仄聞後命詳周南留滯宿病淹沈慈親弱息取給儒
緩教授生徒遠不百里陶公責子對酒賴以遣憂楊雲解嘲
覆瓿謂其擬易年屈知命遲莫何成往昔情親豈能無感曩
時流舊希瑗坐擁官賞治第鍾阜沅蓀傭書江皖音塵闕如
宣明青油之幕威靈若神貢叔樵蘇之談履綦燕絕璧瑗雖
任編纂劣能庇身藹如一揚蛾眉見排羣詬凡此二人比相
親善共恃足下丹青月旦翦祓提攜谷風昭於寘懷日月翼

息貢精北望率通短書規古自期略愧不具

復譚仲修先生書

五月廿日伏承手畢矜寵過當諷籀竟紙喜極而悸既經高名點定海內非貳冀可斂衽但社櫟之夢曲紆匠伯之阿牙琴之響重激鍾期之聽不能自任遂至感慰昔讀上元許起居集中有贈君之作邇時先生方以盛年周旋人世樽桑初升曜逮崦景惜詳齒逾不惑淹留無成神龍揚光莫由豐黍適爲長者點耳漢代中興制科將啓覬君起應徵車冠冕英俊庶西堂塙士再有其人已未丙辰勁居大殿願無謝病未能使海內失望也經生壽庵仰蒙霑接渠從宦非宦心醉老成自奉話言披析神智渚宮之謁不虛生此世矣

此書甫寄去而先生

計音適至余挽詩有書報秣陵垂盡
日謂此也一言腹痛遂昧平生哀哉

乞樊雲門方伯檢還學製齋文彙書

日者賚謁鈴嚴荷蒙霑接詢其家世寵及文章顧已循涯實
逾素望昔塵覆瓿之製曾無寫副之留因緣繆先紹介之詞
遂預執事盱衡之覽癡符自炫老革無能僣父妄擬於論都
嫖母豈工於倚市前丐繆君請之執事檢付寒人蓋遺簪敝
履憶而生憐春蚓秋蛇依之爲命亦以齊侯既顧糟魄宜歸
和氏非珍武夫當反遷延未報岐路徘徊或以執事簿領填
委圖史縱橫慮此園蹠么臠之書屨入挈令文移之內城旦
司空縮繩同束由庚酒誥篇簡終淪雖承前席之榮不免閉
門而泣神期冥索痛極生離伏懇執事董飭小胥料量挿架

必有跳篇出如躍冶得使揚雲最目復注丹鉛廣微慢戲追
思點竄擊鼓之求亡子喻此猶虛歸璧之敵連城情無多譬
哽咽干祈屏息待命

與王子常先生書

去今兩歲獲奉清塵堂下一言遽膺善睐自惟疏賤私用屏
營日者報謁寓齋留刺而反思君隤側未嘗去懷近以伏雨
闌風耳目俱隘旣軫越人見似之想彌切鄭緩爲儒之懼至
櫻小極戚戚無惊昨承頒賜大集如餉枚發繙帙籀諷不能
自己昔聞道路之言亦謂先生僅詞人耳今乃知其包含雅
訓揆張人物永嘉學術金華文獻浙中宗派具有淵源又六
合之外極往聖之所不論九州之大證鄒衍之非噉言儒生

壯游資其箸書信足傲復堂軼漸西矣翦翎送籠使看百鳥
乘風破浪才得一州覈公所畜未爲遇也詳喜接前輩交皆
老蒼同時服膺請從此始鑽仰卒業再申鄙忱

答朱菊屏書

菊屏足下損書累欵至於不寐植根異所古人所歎非俊疑
傑信爲庸態浮湛人世與憂俱生乞食江湖誰能自免碣岸
漱水空閱來風道高謗興請無抑鬱寧省人士稍衰於前昔
者惜抱尙有下縣荒村之比況至今日更難爲譬周黨之思
閔子顏遠之懷堅石樵蘇不爨微言絕耳知君不免恨然有
感也遽六玉立孟晉逮古恂甫淵雅追風正始彭城二妙殊
難其儔詳與足下幸皆得而友之洛水之戲元箸超超新亭

之集藉卉未遠子桓南皮方斯徧矣詳喘病間作觀書之興
進銳退速足下浸淫選學足張一軍子韻而後遂有替人車
中子慎益以所聞其許我否承示諸友叔節繩侯屢接言論
解張兩子闕然未聞次弟訪求期之異日而已

與韓紫石巡按書

詳以蹇淺粗材昔謁鈴下荷蒙推分霑接殷勤逾臨海之蘭
閣置東吳之長柄睟容有穆飽德維私近以月瑄數移使星
遽引皖公山色遠導前旌揚子江流上泝疊舸猶復濟湯田
於一漑請振災黎覈蘇賦於三吳概從平劑驪駒欲駕方臨
睨於將行燕雀回翔爲啁噍而始去此則齊臣之謂利博禮
經所云有知河潤澤及豈後古人歌挽不留奚啻吳會詳客

授上海假歸故里所居距鹽城四十五里禾豆焦枯鹵水內
灌風塵晝昏枹鼓四驚鄙宗所云大兵之後必有凶年今將
轉乙其語以爲後慮知公移節西上當復引領東顧耳通問
稍稽謹致數言以當贈策金素方臨玉體自愛

贈策用
服虔說

乞鹽城尙志書院諸君分寫文集啓

諸君躬爲都養日侍精廬師法導於西京樸學揚於東裔習
瓠首者數以十計預繇繙者豈惟兩生兔豪未禿灑墨盈管
鱗角將成遙書積卷顧有禮堂之定冀分鄰舍之光遴手朝
膳然脂冥寫玉環飛燕肥瘦弟而俱工野鷺家雞品藻息其
聚訟漢家太史之副方藉臧山晉氏脩父之文敢希貴紙

謝孫明府啓

孫名友萼時官江蘇桃源知縣

竊以光風轉蕙異畝同芬膏雨潤木晞陽愈茂王門操瑟雖
訶距於廝庸哲匠運斤乃雕鐫於枯朽曝腮翳景鏤骨銘恩
伏維執事岱水英奇太原家世雲官鳥紀誕於淵懿之區海
運鵬搏奮其扶搖之勢清流選望烏鹵牽絲吳濟陰之宰邑
權領朝歌潘懷縣之登城不遠鞏洛但以地當孔道歲直彫
年雁戶流冗鳬茈掘閱未免壺殯五父紆仲路於周衢倉粟
東阿偵子奇於共載此則蟠根錯節益厲升卿執掌擁腫漸
依桑楚馴邀飾叙逖聽眞除詳承藉吹噓久深銜戢漢家臺
牧工寢文舉之章歐冶洪鑪屢讐干將之氣隔龍門於三百
未襞衣裾求駿牡於千金尙希襴被

謝徐積餘觀察題慈竹居圖啓

使者來甯頒到題冊鄉風拜嘉諷誦再四伏惟尊製具體昌
黎澤以藻韻譬之湘絃激越答楚客之清謳雍琴徘徊軫齊
卿之承睫援青松以示志矯立人倫之宗勉黃髮以爲期曲
荷寵靈之被拳拳款實誠移我情詳飭桑宦學客久思歸慈
竹營居年當垂莫味公區宏贈詞之旨區君題詩似昌黎送彌
動莊鳥積痰之吟南村招隱歸柳色而方深東閣觀奇效蓬
心其有待

與屈逸珊夫人爲先妻徵詩啓

伏惟夫人高陽苗裔靈均遠孫閨風縹馬佩解高邱遂閨揚
蠶衽敷靈瑣詩傳十索玉臺然脂之遺美求九州彤管歸黃
之儷同心並結比翼聯吟豔若神仙遙通河漢比之墨琴之

侶惕甫照圓之配蘭皋遠溯乾嘉更傳韻事詳自吟蒙楚永
憶稠桑複塹埋雲曙星替月攻苦食淡誓欲報以平生握蘭
折麻願廣徵夫篇什紆哀九逝賁寵三泉企注瑤華飾爲冠
冕林下清風勿嫌唐突

海上流人錄徵事啓

自古易姓之際洶洶時時久而不定人士轉徙逃死無所從
鳳之嬉甘去邦族秣馬之歌且戀邱虛各有寄焉理致非一
至於交州奔迸猶爲南土之賓遼海栖遲不墜西山之節抑
又尙矣若夫變起倉卒命在飄忽指武陵爲仙源履仇池如
福地息肩救頸姑緩須臾對宇連牆相從太息今之上海其
避世之淵藪乎鄙意所區約分數類其有金閨舊彥草澤名

儒不赴徵車久脫朝籍丹鉛點勘藉竹素爲萱蘇金石摩挲
齊若光於崦景伯山漆簡繫肘如新子雲元經覆瓿不恤此
其一也亦有賜休投劾哀郢終蕪微服輕裝近關獲濟跡閤
熏穴之求智免據圖之請露車父子惻愴橫流靈臺主人周
旋洛市又或邱壑獨存觴詠不廢泰山故守尙事編韋母氏
家錢日營雕造朝夕校錄同執苦之諸生知舊談諧助語林
之故實又其一也復有幼清廉潔探道淵元日承長老之言
側聞君子之論子眞巖石隱動京師少游款段素高鄉里牛
醫馬磨自取給於庸書禽息鳥視迫偷生於晚歲修齡名士
之操深拒胡奴興公白樓之商能舉先達此又其一也懸此
三例思成一書跡彼諸賢錯如棋跼或流冗吳會但署侯光

或往來上黨競傳道士東西之屋須就訪於司徒南北之居
難徧尋於諸阮悲夫陳迹一移空名遽盡墨子不黔之突難
問比鄰宋罕雙對之牆易迷騶卒用是仿永嘉流人之名錄
海上羈旅之士略及辛壬以還不涉庚巳以上謹施條目準
此縷書異日流傳當廁乙部不徒巷苞開出牽拂相招越陌
度阡枉存至悉取斷目前僅同耳學其或良才不隱改服康
時引鏡皆明投袂而起此自後來期會未可預陳須知此錄
致四方靡騁之嗟非九品論人之格也

城南舊游記

吾邑南城之外有地一區廣裁逾畝環水浮浮淪爲灌莽老
屋數椽支離撐拒前明鄉先生宗子相讀書處也墓委其左

傾圯就夷余昔在弱歲與同學王子奏雲顧子石孫徐子月
評覓游此所溝若縈帶一越而過披草求徑率蘿得門鳥嚇
人聲蟲齧衣影招魂像室嘯清風而四回談詩荒階起沈魄
而共語爭其派別或祧于鱗慎其裁量至詆錫鬯裾裾焉浩
浩焉窮天地之廓馭古競趨忘名字之賤執衡自衛當此之
時亦一樂也歲閱十稔余客袁浦寓書邑令規其修復乃匿
余赫蹏託之宿旨歛錢資力秉算非規積基不高洪瀦易漱
拓宇絕隘傾義始明櫺桷斲以柿材廊移局其躡步平原之
祠旣落不徵譙國之文南陽之竈雖封罔剔安平之碣好事
何如噫嘻陋矣念余廿載謀重鄉聞攘獮不歸隙駒疾逝同
游舊好罕與周旋奏雲化爲異物顧徐遠客秦方下泉款款

謁夢如生長風颺颺詒音數梗於是周家墓道奚啻黃壚洛
中綦迹坐更白社代興之諾蕩爲垂天之雲後游之期思廣
縮地之術追記始末揚榷而陳匪獨流連隨會過九原而撫
然庶幾隱軫元瑜重五官之太息境之廢興又其荃臚焉爾
射湖春泛記

獻歲發春光風澹迤柔萑菴畫繇羽弄晴居近射陂雅稱靈
境客來不速請尋樂方於時湖水輕碧箭流乍平回聚成紋
縐如綺穀料理烟艇狎玩洪瀦艤觴盈丈廣於瓜牛之廬屠
蘇四圍映彼翹鷗之館遂從近渚放乎中流舉衣袂以招風
齊吳榜以擊汰荇藻微動老魚驚而跳波烟霞若空賴烏墮
而蒸水翠羽前導近人忽飛紺眉俯鏡掬影俱染淺澤之草

勢與蘆葦爭齊曲流之隈隱爲鯉鯉所據日至禺中復紆遐
矚榜人一嘯漁子環集垂綸灑釣投網鳴榔競如脫兔張兩
甄而疾趨呼擬蒼兕厲一軍而突起課獲稽數譁鉅則聲可
沸天得雋爭先拍截則舟驚赴岸茲鄉清景莫是爲過焉旣
而炊烟縷織油雲冑樹緒風徐振疊浪忽生長年操舟若神
東西逐鷺雲日黯淡天地低昂效鰣鰵之舞仿佛洛濱凌鵠
鷺之翔差齊枚發衣冠傖楚亦解陶春彫剋之餘物色無幾
遂相與岸輕幘賦新詩叩船舷於烟暝指村聚於雲際奚童
久俟良醞正熟牛宮雞柵暉麗夫斜陽桑泊韭畦蘆敷於隙
地晚景流連殊不寥闌素心旣散墜歡莫尋宿醒初析爲此
記之

辛卯八月游焦山記

宋謝靈運登江中孤嶼詩云亂流趨正絕孤嶼媚中川今之
溫州之江心寺也余於省試之後覽物南徐東瞻焦巖揭焉
中峙重味謝語若符靈賞因與友人袁君澹生羅君耳伯表
弟趙君廉昉買舟往游時日上仄景風回怒波斜帆劈箭遙
翠款睇亭亭桀豎攢圖矗霄積雲不興曉露猶沐神竦企跼
宛如再升旣抵山下振衣入寺草藉柔茵樹灑空綠鐘魚應
響幽鳥一鳴信步尋覽彌相娛慰遂叩銅鼓摹經幢訪姬周
之鼎覓華陽之碑退傅委魄憑弔藏書之樓先士盛藻徘徊
徵詩之閣出寺東行委蛇遞上自左而右陂陀漸下窮其所
至計歷一周其閒憑高榭據危岑拭苔剔字垂足窺影徑踏

叢薄蛇虺竄驚嶺俯雙椒鴈獺盤恣神悸目駭若盈若虛日
逾亭午始飯松寥桑門之饌屬饜回慮京口之酒引滿舉白
濤聲狎於耳際塵境隔乎人世仁智研悅效深赴奇譚諧賞
會忘言永趣雖非搢紳之儒抑亦門素之舊準諸昔流相視
而笑客筵甫闌榜人肅待略契要領遂罄游興於是平揖山
靈揚舲西邁悵悵回顧邑邑若失結茅佳處預留約於山僧
浮觴南皮願長偕夫季重灑筆爲文以記梗概其他羅縷非
所及陳則亦置之云爾

丁未六月游後湖記

丁未六月五日清河吳君溫叟丹徒陳君宜甫儀徵吳君召
封江都梁君公約相邀爲後湖之游出太平門雇兩小艇分

坐諸友船舷去水僅二寸許舟人使篙漸入深際蒲葦菱荷
浸淫搖颺空翠倒景微風吹漪夫渠乍開濃潁的礫異禽障
葉聞聲拍飛窈窕冲灩澦宛與古會行一炊頃至湖神廟小集
西移僧前問訊設茶見款出曾文正公像相視宗臣須眉歛
手致敬上有廉卿慰農諸君題詩墨迹黯淡又觀彭剛直公
榜字楹帖復登北樓直望幕府諸山東眺鍾阜近若拱挹回
坐小憩憑闌西顧城堞蜿蜒邪互南北雞籠一山勢欲吞納
往登豁蒙目窮俯視今則左右送覽延想山阿獨處誰語唯
有怵然浩歌遺彼遠者余客茲土於今六年昔履湖湄沮志
而反不速之客乃藉勝引獲遂宿心豈非有擬者必靳涉想
者自赴天時人事適與際會亦得其偶而已奚鏤舟之可尋

蒼茫之足問邪清景一瞥若追亡通用特記之以訊諸友試各凝想以證吾言

吳溫叟青溪泛月圖後記

繆蓺風先生爲人倫領袖海內談士依以揚聲余與溫叟白石同館禮卿觀察所獲侍蓺老奉手受教一日招余三人及江甯程君一夔賃一小鰈子沿緣青溪之間垂柳蘸波雲影半翳窗納遠岫風吹虛襟已而月上半規漸映四際林鳥振毳游魚躍空置身虛明矚然不滓還飲於金陵春越醞引滿吳語豁懷扶寸肴脩味逾方丈集後數日白石即景爲圖追摹未失贈之溫叟臧弄數年頃者裝池屬爲小記時蓺風讎校中書往來京輦禮翁白石先後凋喪一夔久不相聞余則

欒欒銜恤老病慵疎溫叟遼落寡懽棲止未定追念前塵惻

愴人世不覺涕之橫集也

此記寄溫叟來書言同游者尙有梁君公約而余文已成不可追改

用記於此知蘭亭之集亦有方回不可以義山爲誤也

海天夢月圖記

代平湖朱象甫作

右海天夢月圖余爲第二姬恭人陳氏作也姬諱月雲墮從銀闕誕自金閨裁扇憐渠褰簾呼姊淪精委照盈盈皎於當樓對影聞聲奕奕競於超乘甫擅成蹊之譽遽占幕廟之徵抨蹇修以爲媒誓孟任而未悶於是千絲越網喜得先施十二巫峰恍瞻神女鳳簫遞引鸞鏡蠲愁謂襍飾之無雙擬溫柔而終老況其心容互善才惠兼名縑甯比素託熠燿之微熒跼解承華翼林鳥之反哺一門之內余有賴焉又其歛襟

自抑敷衽工陳鼓雙橈之儼舸默喻抽觴屈一粲於靈妃解
紛掉磬宜余贈之美珥寵以雕楹小家碧玉謝此嫫媧房老
翽風愧其茗芋者矣姬以首嬭不育馴致虛羸病軫聆呱殤
憐坎瘞重邁父憂欲哭不可余時將赴京師雙雙遽發魏芸
泣血淚沾漬於襟裾班女升輿志愴悵於尊酒及夫僦廬人
海瑣屑經營處分平章不愆於素越羅齊縷咸出精裁雪鱸
雲抄日陳鄉味形諸善謔桓車騎之經新窺我佳賓山巨源
之致答曹事餘間敬爲閨友未幾海內鼎沸南北崩騰挾姬
急裝倉黃赴滬時則啼嬰在抱驚魂未甦食蓼甘辛餐茶逾
薺余方幸其體中漸復如款冬之耐霜廡下羈栖若詹諸之
翳景圍圍將寒皎皎自見不意時當癸丑彭訴庚申宿疚相

陵良醫數謁轉側呼號殯殮待盡下招九逝之魂絕粒一溢
之米藥店飛龍長辭歡子桂宮顧兔復伴姮娥嗚呼碧羅雖
見石割波沈錦瑟無端絃偏柱促姬卒年二十五歸去知還塵汜鏡
歛之騰夢來何處烟銷鑪篆之熏茹痛千名寄愁茲所惜夫
暮雲驟合哉魄初生高邱望遠阻弱水之三山白露暖空隱
窮波之一髮乞陳思鏤金之枕夜夜蘧蘧臥潘仁竟簞之牀
茫茫昔昔徑獮紫府往叩玄扃執羅袂以掩涕用感洛靈乘
玉軼而並馳願憐夷羿庶幾繼齊諧之志怪課寂求音與吳
質而同眠塞悲以妄而已

顧詩箋注序

崑山顧亭林先生捐讓百代卓立儒軌其詩沈鬱澹雅副貳

史乘近世流傳之本間附注語據錢唐袁氏所言即亭林自注也叔師太沖已肇此例微之義山亦多引古當時西河輕肆詆戢距知賢者命翰必有祖述然先生特略舉其凡含意未申率待尋涉爾年以來罕聞擁篲山陽徐先生嘉篤耆顧詩首勑茅薊刺剝羣籍箸爲長編甄策宛委之遺覩土昆明之劫羅縷條達綜其要會事在左證語絕支蔓應璩百一撫諸家以定尊阮公詠懷守蓋闕以俟哲歲閱一周注積廿卷可謂亭林之功臣淮海之英傑已竊論注此詩者厥事不易時值代謝書更禁燬舞竿銜木至隱廋辭采薇飢桑相和楚調或致載籍褫奪名字翳如自非博訪通人廣求徵臧守己專輒鮮能卒業今茲薈粹權衡體兼鈔撰李善每據圖經元

之備錄碑狀蒐輯之富裁汰之精定使北研再起抗手同心

烏程施國祁注元遺山詩 引金源別史文集略備 价人潛愧鑿空皮傳斬氏吳氏集覽每多附會

雖有康琚不審僕鑒闕釋既攬宏綱無累虧景昔曝書朱集

精華王錄注者皆鄉里之後生曝書亭詩江浩然楊謙兩注皆嘉興人 或徒彥

之胄子惠先生士奇為漁洋門人 故宜構李父老近餉叢談

紅豆門庭遠接先輩此則寤寐音塵鑽研傳記結芳蘭以崇

佩被以光風賚油素以隨計證之汗簡孤擁鳴琴獨嘯長阜

持較數君孰為難易必有賞心能一歎耳詳欣覩盛烈出共

商略屬命點勘偶拾漏義飾膏益黛何預淑姿執盈御冲降

挹小善豈意一承寵光遽規立晏將非溫雪逆旅交越恒端

沈侯坐隅契通宿旨遂令務觀杜口慚詒鳳巢周續奉手奮

拔馬隊適彰宏美云爾如詳淺言固無關妙道也

京師坊巷志序

京師坊巷志上下兩卷即順天府志卷之十三四義烏朱鼎父侍御江陰繆編修蓺風先生所同輯也侍御客游嶺表蕉萃以盡先生假歸數歲復取元書勘定時有損益意將裁篇別出以餉後世詳竊聞其議因亟從臾刻之而謹敘其首曰京師首善歷姓所崇班固張衡號工摛屬咸寫其狀至於坊屯署列平叔牒其秩名巷巷開出太冲侈其猥騎奧區神皋遂箸此號但黃圖故事翔箸宮觀宣明建陽劇從蕞芮上黨懷義何預州郡之稱馬糞烏衣豈僅王謝之錄鳩而合之取備掌故經緯雅聞洮汰蕃會雖椎輪於官書可榻署爲別記

兩君之纂於是偉矣夫皇居帝室九流鱗萃四會蠶午王侯
列第之區士夫泊宅之所郡國邸舍之攢香亭傳祖道之宴
集昔人所載瀟漫散紀旁魄而論固爲壯觀錯綜最錄厥難
亦見學非宏贍交無雅宿游肆閎於借閱發匱窮於短說文
有可采則累幅遙書事無所徵則開卷易盡城西公府自遠
銅駝東都主人未鄰金谷求董公之甲第楊子之宅俄空指
潘仁之閒居延喜之里蓋闕積此畸隻遂爲偏枯其難一也
風流遐覽事資雅馴權要栖止隆富僑託高閣連雲當道直
啓旁羅捃撫漫有羈厠廬館集宿揆張許史之居鐘鼎擊食
鹽豔翁質之壯萬章柳市徇薰胥而見書富中玉饌競區宇
而附麗裁制旣失多詒塵點其難二也藏身人海仕隱所充

待詔金門通籍禁裏游豫觴詠率儲故實行樂之地草木生
欣遺響之烈鏗鏘在耳五鬢先饋諜景動而成光三徑甫開
挫廉萃於接跡詞流掌錄雅在兼蒐顧有倉卒成書員程迫
限以此編輯奚事瑣言藉文寔淺概從擯落於是憑虛安處
寥寂無聞清漳夾宅認履綦而不呈黃墟乘輶邈山河而焉
寄目論一滋雷同相習擁篲達者賢絕且莫其難三也兩君
紬書東觀侍彥西園七略四部流別甄微郢握隨掌淹伊專
翫共膺美選述成此箸勑始斷心妙有源貫凡夫公私載籍
鈔縑祕冊洞若觀火析如合蒯區分類附取證宏撰譬之雙
離揚輝二龍競馭洛陽茂先之間交豁承明三輔臺卿之書
定爲決錄徵事富於楊街不隸伽藍先路踵夫次道遠涉勝

代方謂塵諸廣內獨煥驪珠祕之帳中快逾鼃飽往觀侍御
遺書載此志目蓋將有待別行遷延未果今先生雅意棗此
遙質冥契絃歌赴節應涌蓋山之泉篇簡尙新致諾秣陵之
答平生風義於此益見或以龍漢小劫兩門昔燕新數中興
閭閻變質江亭藉卉周侯顧而喟然靈光支持文考嘻其有
作則又讀斯志者所爲想開元之全盛憶春明之夢餘悵悵
於景物睠睠於左契也

懷知詩序

余志業猥下早罹貧悴囿於邱里竊違本衷每懷出門芳草
之思冀收伐木友生之益陳辭獻藝輸肱論心往往褊長者
之衣裾孳鴻生之襟帶丹楊京尹張憑因而直前介休人倫

茅容偉其獨異至於南冥北極鱗羽相酬東陵西山朱紫頓
別一言投分要以百年之期數面成親中之永夕之誓又或
停車下澤接武平臺附石友之驥旄禮僉人於牛屋孔璋同
郡盛譽其文叔夜平生驚詢以姓洛濱宴集則平揖王裴白
樓商略則聯情孫許遠則千里百里契則新知舊知宿德先
達咸從奉手而求昵交密友不翅取懷而予結言符賞樹義
銘膺周旋廿年幸紆勝引歲月不恆微生多故輟服在御忽
疑黃壚之游簪屣既遠莫預玄亭之列天蒼蒼其無極地盤
盤而四鶩飛蓬疾轉逐征車而不回宿草方抽闕下泉而永
逝扶風仲蔚獨翳蓬蒿洛陽蘇季空殫菽粟存問絕於時流
呻吟託於窮士靈光巋然之賦邈若山河微言絕耳之詩積

於篇什況復生死殊涂宸隆異等盱衡而誥未沫音塵把臂
相要詎忘疇昔聽歌河上特濯漑於方來羈蹟吳中恐嚶鳴
之修阻嗟乎相如避事已值途窮公幹偏人久嬰痼疾一夕
九逝無縮地之方四面千里非盡言之所冬釭夜寒積憂不
去驅染烟墨寫此離愁各繫於詩用涉遐想擿諸水涖綴於
林表冀衝波之鯉吞而分投翳雲之鴻銜之遠寄更須款曲
焚告幽靈凡所懷人瑞安黃先生體芳長沙王先生先謙臨
桂謝先生元福丹徒謝先生庭蘭正定王道農耕心上元周
左麾鉞江寧姚璧瑗佩珩泰州袁澹生銜李極軒星南高郵
宣古愚人哲東臺汪作舟濟夏虎臣寅官江都梁慕韓葵鹽
城陳惕庵玉樹高鑑之鏡蓉同縣王奏雲庭暎顧石孫碩也

海上題襟詩序

句容王君月莊章君步雲經君壽庵皆僑居鹽城往同受業
於余族孫唯亭此三人者情好甚密坐則接席出則聯襪吟
嘯相亞聲響亦競春林藉卉跋履爭嬉冬夕凝鉉圍爐互煖
寒暑數經淬厲自積先後就縣府試各魁其曹月莊旣貢入
京師從事禮部步雲負極白下壽庵薄宦需次武林自此分
張曠逾千里徽絃燥濕輟引停波岐劇西東交魂逐夢雖書
疏往來莫喻勞結己亥秋冬之交月莊壽庵相次假歸步雲
亦歸娶於鹽復得合并咸大喜過望戀嫪良時瀹菴溫醪傾
襟錯屣短晝罄晷秉燭申於夜談古懽惠綏同袍恣其可笑
並日而遊私謂難繼青春未謝良辰將行念夫昆侖之水區

澥分流泰岱之雲乘風布蔭出處殊涂後會不易因人爲嘉
會留別二詩裝池成軸以記欸眷月莊尊甫煦公復昂以名
篇荔亭陰孫繼有和作別屬余爲敍書於幀首余與三君吳
味敦悅賞會從容仲宣詞賦子桓尊以論文蜀莊沈冥楊生
準之爲臬速藻不工點璧輕任乘車戴笠諸子慎無相忘握
蘭折麻同好徵於物役昔唐人有漢上題襟集今命之曰海
上題襟將寄雷夏王君以小篆題顰庶不負此舉云

送王月莊赴京師序

夫緒風吹萬聆響者辨趣朝陽吐曦憑喬者崇睇直景謝規
於曲木曼綆杜汲於智井伯昏溢鏑窮於不樹之臬任父投
餌悵立無鱗之淵枳句來巢虎魄汲芥人羣之賞味其有應

之者乎余與王子月莊交自往歲契有夙分如豆合黃譬石
投水揚徽四達之衢估直五都之市渥洼驥子軼涂轆塵丹
山鳳雛綵羽駢采翕虛善受有容乃大披豁昕宵日接晤語
天棊離會不恆厥居將游大人以成名復有京師之遠役安
固愛翫挈賢妻以俶裝元成靡浬起壙僚而隨牒里逾二千
別當一祀僕有昔聞託之贈策古云都會羣材所充膠飴蘗
杵盛匿黨徒杼首鏤膚各擅方域設使通無騎驛媒闕蹇修
奮榮莫見衡賦曠於已知閬陽不施元經筮爲婦處雖枉故
人之書罕延長者之轍嘯侶搜逮奚能無望然近時輦下耆
舊彫零輪蓋所周率背夷惠韋弦之契强附山王問移中之
蘇武直謂未聞逐車後之康成私詭多識朋牖自開虛舟復

引即有操衡秉纘噓枯吹生膏梁世胄假翼狂於重霄州部
軍民叢瘠擠之九地冀雲閣之迴聲必鮑肆之翫臭是則王
城堪隱大雅誰歸竊謂借箸而籌請徵發篋之始官曹寂寞
尙友前良揖僑札於編韋躡徐陳之堂室宿士可作音塵締
夫古歡詞客有靈胥蠻競於浮景斯即閉門掃軌酌醴焚枯
而黃車使者許貢精誠靈威丈人至歆寤寐何必結銅駝之
少年騁碧雞之雄辨西都宴喜橫鵬公卿南國人倫取訶僕
射尺璧寸陰祇役剽慧往求辱焉信爲點耳月莊行矣春水
方生祥飆送颿縹野極眺鼓飛雲之軸跋浪洪瀦駕乘日之
車轢景赤電皋橋羈旅弟諸扶風賓萌靈臺栖遲行過河間
舊吏題襟賡續期晤賞心

時經生壽庵先赴津門
期與月莊會於京師

出視小文

應紆回顧或者眷戀疇昔賦詩見詒仲瑗北面不以官閥相
夸顏遠延首至出階檐想似僕之馳夢左右臨岐徘徊十行
一札覬損文鱗九逝七襄寄言高鳥同耿綢繆難爲胸臆至
夫秋風揭厲驤首皇涂長離嬰網騰詠圭陰巧冶淬鋒濯穎
鑛朴遭遇時來馴至台鼎富貴君所自有殊非僕意所溷也
送經壽庵之天津序

闌風積晨韜陰若晦簷鳥四聒庭花半委愒日苦短怨夜甚
促茗灘益泊膏凝注的別狀屨至晤言不歡則經生壽庵戒
涂將行相聚廿日今方遐邁東演析木王程有期執袂申懷
勉以遠逝飛雲蓋海凌薄洪濤左眺扶桑右睇肅愼穹魚健
翥巨鵬扇翼雲緞吐豁翕忽殊詭風水搏戾旭卉礪錯奇景

異彙灑漑塵垢曼聲助吟抗音激越瑰詞連牻警律環餉快
哉孤游千里目送惆恍敷愉憂喜兩萃愁悵小卻離情轉悰
宿心申寫率多端緒書此璣語媵君客裝

自序

梁劉峻孝標遭世坎壈嘗爲自敍謂比馮敬通同之者三異
之者四吾郡汪容甫先生追擬孝標其辭尤戚當時大雅咸
爲嗟閔余單門後進羈屑異所流俗不容方寸輒亂鑽仰先
達復有繼作不敏之誚無所逃罪夫容甫早傾乾蔭母子相
依賣歷爲生傭書自給余弱年失怙資進無階菽水不供慈
顏嬰戚此一同也容甫洪支彫落宗鮮近親余家世鼎族凌
夷衰微蟬嫣孤蒙不絕如綫此二同也容甫君火爲祟絕意

仕宦余肺病侵尋流連行藥負疴顏簪百憂兩集握髮劇於
亂絲炊炭烈於鍾玉此三同也容甫文采豔發譽冠人倫目
翫班揚氣劘屈宋淮南賦其桂叢河北傳其榴枕是以書籍
願歸言談爲則余粗解摘辭遞相非貳阮籍呼爲老兵左思
夷於傖父愛靳吹噓惡生創痍此一異也容甫交游漸廣羔
雁成羣扶風襲裾豫章下榻定僕射之文飫君侯之膳余束
縛蹉跎妄蒙一顧綢繆嘉會研覽篇章恃寵揚螫橫遭嚙害
漳濱淹臥陽岐連蹇應生惟燔枯魚元叔自喻窮鳥此二異
也容甫博物強識典校祕書心貫九流胸羅四部余結髮自
修不爲章句情志相攘艱多智寡才劣於仲舒長逾於伯業
鄭緩輟其呻吟齊后卑其糟魄嚴周未聞論衡罕習此三異

也容甫晚善治生不虞懸磬室有圖史門接賓客余傾家濟難起偃爲人逐影亭衢宿逋相躡祇首陽之將從鮮優贏之足恃雖以囊被見嗤不免甌塵告匱研桑心計至無用之鉅覘兼呈非所覲幸此四異也嗟夫容甫比於孝標已謂不逮余於容甫又愈下焉是知九淵之深未及劫灰餐荼之苦劣於含鵠久病初起俯仰無聊攬筆龍鍾薄言胸臆好事君子或其許之

先君子手書龍文鞭影敬跋

此龍文鞭影二冊先君子遙書楷則授爲日課榻署不肖之名題於卷首時同治甲子也不肖甫六歲粗能倍諷稍異常兒督視端規親兼師傅貧宗衰緒爲庶百年攜夸坐賓重若

瑰寶不肖方長姿性乖越泛耆羣言羞爲功令之文屢困童
蒙之籍先君遘債閔默賫恨重冥垂沒遺言憐其未達不肖
泣血沐浴諱窮求通操瑟揚眉挫鍼攘臂卒乃玉因石削風
引舟回菑川習業再上何聊會稽歌謳甯將晚遇加之宿病
侵剝知識摧頽諷籀諸書鮮能記憶偶檢先君此冊一覽畢
卷覆誦無遺愧以小時徒聞了了先君逝世廿載不肖羈貧
失志榮賁無階手澤如新背膺脾痛楹書先令交隳遠圖刻
骨鐫肌駟追不及敬記其後爲述余哀

楊子勤太守雪橋詩話跋

右舉本朝之詩存本朝之人因本朝之人存本朝之事其意
深厚其旨雋永具徵文考獻之心無標榜門戶之習別裁僞

體導源正宗其有資史料則遺山之中州集牧翁之列朝詩
集小長蘆叟之靜志居詩話顧秀野之元詩選也王阮亭之
說部述庵之蒲褐詩話錢東生之文獻徵存錄皆函於內而
出諸鎔裁妙有斷制始知此事體大載筆非易至如袁隨園
郭吳江之箸直如計簿自相貴耳豈知風雅一道嫺於立言
若更孔公升堂入室則鍾仲偉固有定品蕭德施宜略其蕪
穢矣錢朱之選詳於東南而略於西北君書至彌其憾而於
滿洲人物甄綜尤悉先士英靈於斯託命此盛德事也兼以
體備一朝首尾屹然不相雜廁如侯官鄭氏之小傳番禺張
氏之徵略流傳雖久俱非斷代且鄭意主爲文而事因詞絀
張氏之標題摘句而輕於斷割蓋均以小道視之託體不尊

傳誦自鮮此書一出譬之既登泰岱俯視部婁日酌江河漸
蔑鯉淀又幸其不錄謝公同時之言忍絕何遜生存之作斯
則免於謗議善爲周防固不得以餘事概之而云壯夫不爲
以自損也

蔣君厚民遺令跋

昔鄭卿大漸垂戒能貧齊相真冷詒書示壯平生已矣仍吞
欲絕之聲魂兮歸來甯瞑猶視之目汝南雞黍之約未果於
生前漳濱沈痼之秋致嗟於見故此達人之所遺恨君子於
焉恫心者也蔣君厚民家世膏腴琢磨令德康成游學奉手
通人安仁賦詩投分石友談詒善病奄忽彫年橫罹鬼伯之
催重閔諸孤之藐立身顧託誰爲言提餘息隴胡劣存口占

賴有鼎臣鄭子掩涕受遺鏤膺思舊說中散之狀對延祖以
歎獻撫馬侯之子凜叔譽於終始爰舉先令之訓罄於弱豪
之宣意不盡言綴之哀詠淵客別主因灑泣以成珠伯子摧
絃久息引而絕軫黃壚雖在邈若山河青簡尙新儻更人世
蘇庵義同在三敬逾凡百親戚譬欬偃乎見似之心兄弟急
難憐矣求原之痛孤根弱植當戶充閭漆書繫肘杜伯山之
客涼州幣錦如瑱齊子猶之歆魯賄取譬差工貌同心異蘇
庵寶等楹書準如庭誥思無越畔穠菱以俟豐年甘習餐茶
葵莖至除食籍興公吟詠門多北面之賓謝嫂辭情家賴東
陽之寄趙毋卹出袖之誦肝鬢潛通張由拳抱劒之悲音塵
寂蔑則此一軸也作郢握之獨曜爲隨掌之專翫和氏非珍

夜光見屏天下之寶不與天下共之敬反越石之言勗之而已

說別一首贈周左麾

詳於光緒辛卯浪迹袁浦桂林謝子受先生招置賓館時周君左麾客先生處最久才名籍甚余初至修謁敬爲畏友不敢與言左麾亦未深知余也其秋先生以事解職余與左麾仍館舊署索莫岑寂憂來無端嚶鳴求聲時相過慰發言抽緒宛然賞音自恨相見之晚失之交臂由是蹤跡益密妙論流別裁量古今晝有程課弗獲數詣懷抱所申悉償於夜嚴漏數下僮僕觸屏落雪簌簌燈火俱寂乃猶振襟奮袂劇談忘倦私謂狂態不減古人荏苒款曲遂定衿契會余歸里爲

詞相贈婉戀墳簾有唱斯和次年之春握手再見謂當遠離
常恐危機密發驚禽四集撫名悼恩視蔭若墜積於天霽登
桑掃霞始各收召魂魄敦其初歡余好治目錄旁涉考據左
麾出其所儲與相掎角攢戢駢羅研閱疲紉每論文章曲右
南朝厭薄唐後旨趣既合不言自親秋風文戰君捷我北歸
舟颿江來與爲別刮野沉寥寒景偪仄宿病嗽嘍朝不謀夕
浮雲參差晚晚白日左麾別余余適爲客詎不重太息邪左
麾勉旃胡氏有言古今不死唯在文章往與君論撫掌而笑
冀有一集不媿壯夫左麾行得志矣余雖疲曳猶將操柔翰
箸詩筆藥裹書瓊天裔地表述君之所至而託焉古人所謂
破涕爲笑不在茲與於左麾之行也因爲說別以贈之

名士說義

小戴記月令季春之月聘名士鄭君注名士不仕者孔冲遠
疏引蔡氏云名士者德行貞純道術通明王者不得臣而隱
居不在位者也案此名士之稱自足高式人表矯排浮競故
潁川仲達持此以目臥龍琅琊茂宏下教而尊衛虎求之於
古必如魯儒卓立萬變不窮郢臣好修九死靡悔始能民譽
允孚昭示來代自唐而後俗化澆訛鄉曲猥子江湖小集李
赤胡生之流游神火馬之輩並得揖攘公卿驕穉里閭飲酒
作達率師嗣宗躡屐通訊強附子敬致使往昔榮名降淪輿
隸三桎五葉乃得蕪菁千里一曲遂積濁渭黎邱冒形欺魄
失質集矢巧詆有自來矣然有高世絕俗砥厲廉隅好奇服

而不衰稟幼清而未沫特以宗尙有別旨趣稍殊比黨交攻
詫爲異類陰擠下流陽奉此號一若鴟服適集惡其鳴聲魑
魅可禦宜投絕遠昔之君子今直不肖九變復貫孰云可回
遡游相從周禮宛在是以耿介之士側身人間容止不改其
常風雨貞於如晦脫有相輕偶蒙品目方如寵錫之膺慚負
嘉貺詎敢引爲繆醜縱斧本根嗟乎苟令大嵬狂易勿蹈藩
籬二三有道力行不惑則揆厥所元其朔可考也

改字藥房說

昔嘉定詹事

錢少信大所

隸表德於辛楣南海中丞

吳中丞榮光

袁清

芬於荷屋並資津郢製藉喻湘靈建門廡以芳馨播壇庭以
椒蕙鴻材中苑騷旨斯彰高邱之女相詒蹇修之媒押至因

之攝官青瑣仗節方州馬鄭退爲大師歐趙蓄其素業銘勳

懋德演雅宏風進退百年襟情如涉余久離美疚茹苦含辛

屑翦爲糧咬釜作劑胸中冰炭塊壘難消江上參差潺湲不

接伯庸肇錫雖授正則之名韓擒外甥別擬藥師之號於是

少陵祖德敬避相如

余字審言

魯論首篇願辭君子

遠方諸友來書皆以慎言

呼之紉蘭綴佩采藥充房雜土鹵以俟時後蓁蘋而齊葉蝸牛

左角榜此庠移雕蟲壯夫署之綈底布告親串廣播朋交謂

新麗於蓬心尙無看以舊眼九歌篇第衣被幸有三人楚客

文章河潤冀歸吾黨

興化舊爲楚境縣有屈子祠移祀拱極臺上

擬建鹽城縣臧洪祠陳容祔祀議

竊以智宗既賁豫讓徇國士之知彭王就殲藥布軫遺臣之

勸義均無貳則府主之戚等於所生志在必甄則同盟之讎
厲之沒齒如漢臧子源者身丁厄會世遘皇屯漆室倚柱憂
魯命之將傾周嫠棄緯閔王綱之不振酸棗之役有足多焉
旣而郡將雲興方州幅裂袁曹交鬪齟齬羣雄值舉主之嬰
危向本初而乞援而乃勃蘇鶴立不賦無衣卞莊虎視翼收
兩斃子源腐齒切心操戈拒命遂至蚍蜉絕景豺虎長圍力
屈遺禽坐羈麾下本初不念長者之詈適爲其天樂氏之勇
詎甘相服摧鋒肆虐欲挫金石之堅飲刃如飴致隕冰霜之
烈上客起譙斥謂與彼同謀諫者不容橫怒干卿何事一時
併命聞者寒心袁氏之敗此爲兆矣獨爲君子遽緩所羞斧
質在前義同生死稽諸陳君庶無媿顏射陽舊墟神靈是託

年世飆忽掌故蔑聞閒安靜設未妥郢客之魂殊絕荒州且
寶周臣之碧桑梓之恭此實有闕謂宜糾率義故斂貲庀材
雕奐丹青薦登禋祀雲裝烟駕二離刻其清暉蕙藉蘭蒸九
逝歆其故宇巫陽協筮貢寫精誠靈子傳芭婆娑樂舞荆方
烈士挈死友而來翔漁陽功曹擁鬼雄而下上平輿之龍復
歸汝南之淵遼左之鶴時集丁令之里豈必吳興郡壤但禮
愼王滄州海島唯崇田客此邦文獻好善從同雅素方聞幸
共揚權

讀文中子

文中子王道篇云子見劉孝標絕交論曰惜乎譽任公而毀
也任公於是不可謂知人矣其立命篇云五交三黜劉峻亦

知言哉余案彥升以一世龍門奔走寒峻侔東陵於西山升
淵泉於霄漢望景臨塵摩肩疊跡及其殂謝子息流離葛帔
練裙徘徊岐路平生故人莫加存贍孝標天懷奮迅援古喻
今感激無端託之風諭掩耳疚心頓遭抵几以規爲璜永歎
不聞到實負恩於任何損王通始病覈論繼歎知言當由閔
俗澆訛去茲不遠也

夏謫如摩兜堅室詩題辭

謫如家世名胄幼有璧人之目清言善綺箸戴早歲余往于
役於袁公路浦與君一晤頃復邂逅鹽城屢共談燕求讀其
詩則清麗芊眠華瞻典重五色相宣而錦地自淖八音迭奏
而穆羽潛應幽則離騷博徒蔚則樊南支子沾漑膏馥率足

私鳴況其僇筆兼擅風流殊絕元暉正適新野未墜眼中游
好遂難其人鑽味歛衽神竄形茹君所居官舍距余不遠貢
綦往存蕭牘再賁引吳如之同心助率爾以撫掌湔濯胥疏
榮出非分至於並世士安亮有先達朱紫丹青邱言誰信輒
同匿賦不獻撓涕以指託日月之末光軼歸鴻於碣石隅隙
眇睇罕窺宦奧略綴簡言以志服膺

南洋勸業會雜詠題辭

南洋勸業會權輿江甯經始不日廣場奧區列隧羅肆鋪陳
侈於吳都奇崛軼於王會解署棋布窮般爾之伎態蠱媚玉
映競士女之昌丰誠千載之勝集大吳之巨麗也雖其彈指
卽見轉瞬易虛遼東城郭人民遽非新豐粉榆雞犬豈識不

有紀載曷推嬪遷漱巖王君子長愛奇文考觀藝圃身其間
積日累月摘鉛注槧畫地成圖比綴聯吟略逾百首意主紀
事兼工修詞子注自疏一覽卽得昔道元經注善狀名物衙
之伽藍旁極瑰瑋傳於後世可想其盛漱巖此詠並堪不朽
母謂比迹古人輒愼墨而謝也

學製齋駢文卷上 竟

受業蔣國榜校字
弟三男武祐

